

COLUMNA

Parter nossas perspectivas

FLAVIA HOBI

Dacurt hai jau mangià M&M's gia la damaun. Mia cunabitanta m'ha lura fatg attent ch'ins sappia era be far quai sco persuna creschida. Gea, probabel sin il pli tard cura ch'jau hai uffants na mangel jau sa chapescha betg pli M&M's gia per ensolver. Auter forsa, sch'els na vesan betg.

Cura ch'jau era stada ina giada cun amias en vacanzas a Creta sper la mar, avain nus inventà in gieu – l'orachel dad M&M's. Cuntrari als Maltesers èn ils M&M's da color: oranschs, cotschens, blaus, mellens, verds, brins, blaus. Ti has da serrar ils eglis, lura elegias ti in M&M's e lignas tge color che ti mangias.

Mintga color ha ina muntada. Sche ti prendas brin è quai merda, cun mellen entaupas ti forsa tes um da la vita, blau munta speranza ed in temp grondius, ed uschia vivavant.



In'otra varianta è era il gieu cun pitschnas challenges sco: Sche ti tschiffas brin, has ti la notg dad ir a nudar blut en la mar.

Tschel di m'ha raquintà insatgi ch'el saja tschorv per colors. Quai vul dir tut tenor sort na vesan las persunas pertutgadas naginas colors u ch'ellas na pon betg distinguer tranter tschertas colors. Quant positiv ch'el va enturn cun quai, m'ha fatg impressiun ed jau hai ponderà in pau davart quest fenomen. Sche ti vesas be cuntrasts sco stgir e cler, munta quai automaticamain era autras perspectives areguard auters puncts

da vista – saja quai opiniuns, posiziuns, ideas.

Independent da tschorv dad da colors n'è brin betg per tuts brin, u in stgir rosa da viola po in auter era vesair sco violet. Jau crai che parter nossas perspectives schlargia noss orizzont e gida da chapir ils concarstgauns. Quai fa bain. La finala è mes M&M's brin sco merda per tai forsa mellen sco il sulegl – e cunquai ch'ils M&M's gustan en sa sez pli u main tuttina, duess ins pia sche pussaivel pensar positiv.

Per il mument avess jau – sco probabel nus tuts – gugent in zic dapli colors en il senn da dapli action. Puspè ina giada ina festa, in eveniment, simplamain ir a tschaina en ustaria – u almain pudair envidar tut las amias per giugar l'orachel dad M&M's. Jau pudess natiralmain era cumprar in agen pac per mintgina.

Flavia Hobi ha studegià pedagogia e rumantsch a l'università a Friburg. Actualmain lavura ella sco docenta da rumantsch per differentas instituziuns, sco redactura tar il teletext e vi dad auters projects.